

INUIT ATAQATIGIIT INATSISARTUNI



Nuuk 12. august 2026

UKA2026/405

Inatsisartut suleriaasianni § 33 naapertorlugu aalajangiiffigisassatut siunnersuut tulliuuttoq Inatsisartunut saqqummiuppara:

Siunissamut piginnaatitsissutit pillugit inatsit nr. 618 2016-meersup Kalaallit Nunaanni atuutsinneqalernissaa pillugu Naalakkersuisut danskit naalagaaffiannut saaffiginninnermik peqquneqarnissaat pillugu Inatsisartunut aalajangiiffigisassatut siunnersuut.
(Inatsisartunut ilaasortaq Pipaluk Lynge, Inuit Ataqatigiit)

Tungavilersuut:

Nammineq aningaasaqarnikkut inuttullu atukkat nammineerluni isumagisinnaajunnaaraanni, siunissamut piginnaatitsissut atuutilersinneqarsinnaavoq. Inummik ataatsimik arlalinnulluunniit immineq sinnerluni iliuuseqarsinnaasunik toqqaasoqartarpoq, tamannalu siunissamut piginnaatitsissummi nammineq aalajangigaq malillugu pisarpoq. Tamanna inuutiluni nammineq aalajangiisinnaajunnaarnermi, nammineq kissaatigisat malillugit iliortoqarnissaanik qulakkeerinninneruvoq. Tamakkiisumik silaqassuseqarluni aatsaat siunissamut piginnaatitsissusiortoqarsinnaavoq. Siunissamut piginnaatitsissut sukkulluunniit atorunnaarsinneqarsinnaavoq, aatsaallu nakorsap sanngiillisup qanoq issusianik nalileereernerani atuutilersinneqarsinnaavoq.

Inuiaqatigiinni utoqqaat amerliartornerat ilutigalugu siunissamut piginnaatitsissusiornissamut periarfissaq nammineq timikkut silatussutsikkulluunniit sanngiillinnermi utoqqarnut nammineq kissaatit malinneqarnissaat, aningaasaatigut nammineq kissaatigisaq malillugu atorineqarnissaat qularnaannerulissaaq. Utoqqaaneruleriartornerput nuannaarutigaa. Tamannalu aamma ukiuni inuuffigisani kingullerni imminermut tunngasunik isumaginninnerup ajornarnerulerneranik kinguneqarsinnaavoq. Inuiaqatigiittut utoqqaat ukiuminni kingullerni sanngiillinnermik atugaqarneranni namminnek kissaataasa aamma ataqqineqarnissaannut periarfissaqarnissaa pingaartutut isigaara. Utoqqalineq toqqissisimanarineqassaaq, namminerlu inuunermik nakkutiginnissinnaajunnaarsinnaaneq aarleqqutigineqassanngilaq. Taamaammat siunissamut piginnaatitsissutit pillugit danskit inatsisaat peqqussutikkut Kalaallit Nunaannut atortussanngortinneqarnissaa qinnutigaa.

Pisortanut aningaasaqarnikkut allaffissornikkullu kinguneqaatit

Siunissamut piginnaatitsissut naggataagut notarimit akuerineqartussaavoq, tamannalu allaffissornerulerneramik kinguneqarsinnaavoq. Tamannali allaffissornikkut aningaasaqarnikkullu killilimmik nanertuutaanerulissasutut nalilerneqarpoq. Notarimik ingerlatsineq eqqartuussivinniimmat, aningaasartuutit allaffissornikkullu isumagisassat danskit naalagaaffianniittussaapput.

Namminersortunut aningaasaqarnikkut allaffissornikkullu kinguneqaatit

Siunissamut piginnaatitsissut amerlasuutigut eqqartuussissuserisumik allatulluunniit inatsisilerinikkut siunnersuisumik atuiffiusussaammat, tamanna namminersortunut suliaasaqarnerulernermik kinguneqarsinnaavoq. Taamaattoq killilimmik.

Inuttaasunut aningaasaqarnikkut allaffissornikkullu kinguneqaatit

Soqanngilaq